

«Fair-food» gudogna simpatias perfin tar adversaris

La chombra gronda tracta sco emprima l'iniziativa dals verds

■ **(anr/vi) Betg mo puma, charn, graun e legum produceschan ils purs, ma bain er iniziativas. La dumengia vote-scha il pievel davart la segirezza alimentara e suenter vai immediat vina-vant. Il mardi tracta il cussegl naziunal gia l'iniziativa «fair-food».** La pura *Maya Graf* è ina da las iniziantas principalas. «Nus lain augmentar la qualidad da las victualias», di la cussegliera naziunala verda. Sco tar products da «fair-trade» stoppian las victualias esser producidas sut bunas cundiziuns socialas e plinavant a moda ecologica, senza sfarlattar resursas ed uschia ch'i cunvegn als animals. Quai valia era per victualias importadas sco puma, legum e charn.

Maya Graf vul dapli labels

«Ma nus na lain nagins scumonds», accentuescha l'inizianta. Ins na pretendia era betg controllas en l'exteriur. Tar l'import duai la confederaziun favurisar products da label e pretender decleraziuns per ch'il consument sappia precis tge ch'el cumpria. Ozendi deriva quasi tut la charn importada ord l'allevaziun da massa. Il consument na saja betg infurmà sch'il legum en ses chanaster da cumpra deriva da champs nua che Marocans bratgan sut cundiziuns schamprettas.

Graf è e persuadida ch'ins cuntanschia la finamira da l'iniziativa cun mesiras miaivlas. Sche adina dapli products

da label vegnian sin fiera dettia quai automaticamain damain victualias ord produziuns che fan donn a l'ambient u che tegnian mal ils animals.

Il cussegl federal haja era la pussaivladad da far cunvegnas cun ils grossists: per exempel per importar e vender in pli aut quantum da café «fair-trade».

Hansjörg Walter ha ina tscherta simpatia

«L'iniziativa tuna bain», conceda *Hansjörg Walter*. «Ella è focussada sin ils consumers. Ma la realisaziun è difficila.» Pretendi vegn ina decleraziun anc pli precisa che oz tar la charn, il legum ed ils fritgs. Ils standards da decleraziun da l'UE na bastassan betg, avertescha el.

Il cusseglier naziunal defenda l'emna proxima la posiziun da la cumissiun ch'è s'exprimida cunter l'iniziativa. Ma il pur e politicher da la pps demussa tuttavia ina tscherta simpatia.

«Ord vista dals purs fissi uschia che nus ans pudessan sa cumprovar meglier visavi l'exteriur», di Walter. El fa attent che grossists svizzers cumenzian a producir en l'exteriur – betg lunsch davent dals cunfins – per guntgir ils auts standards. Là na stoppian els betg tegnair en la strategia d'antibiotica da la Svizra ed en la producziun dad ovs na dovrian las giaglinas betg tant plaz e moviment.

Malgrà tut sia simpatia fa Walter attent che l'iniziativa na saja betg cumpatibla cun las reglas da la WTO. Ils mar-



L'iniziativa «Per victualias saunas che vegnan producidas a moda correcta e favuraivel a l'ambient» pretenda ch'ils standards svizzers da la protecziun da l'ambient e dals animals vegnian ademplids.

FOTO M. HARTMANN

tgads averts prevedian che victualias lubidas en in pajais dastgian vegnir importadas er en auters pajais.

La cumissiun dal cussegl naziunal è s'occupada durant trais sesidas cun l'ini-

ziativa, ha pretendi dapli infurmaziuns dal cussegl federal ed ha tadlà ils veterinaris chantunals Alliance Sud, grossists, organisaziuns da consumers e Nestlé. Cun 16 cunter duas vuschs e set absten-

ziuns recumonda la cumissiun da refusar l'iniziativa. Cun 13 cunter 11 vuschs ed ina abstenziun ha la cumissiun decidì da betg elavurar ina cuntraproposta indirecta.